

اوسات عثمیه کبریه

هفته‌لق سیاسی ، ادبی ، علمی غزته‌در

جلد : ۳

سنه : ۲ ۴ جاذی‌الاول ۱۳۳۶ جمعه‌ایرتی ۱۶ شباط ۱۹۱۸ نومرو ۲۴ — ۵۵

ایمپراتور عثمانی و پاشا عثمانی

— مابعد —

عباسیلر بغدادده نصل عجم‌شورلرسه ، عثمانیلرده استانبولده اولیه روم‌لاشیورلر .
بوراده‌کی ذوات کرامتک قسم اعظمی (روم‌لاشوق) کله‌سناک معناسنی ؛ کندیلرینی بیلدکری کوندن
بری بیلرلر . وسوزمی پک‌طبعی وحق بولورلر . مقصدی بیکانه‌له افهام ایچون برقاچ کله‌ایله ایضاح
مرام ایدیم :

(روم ترکی) هم جغرافیائی هم اتنوگرافیک برتعبیردر : بخارا ترکی ، سمرقند ترکی ، آذربایجان
ترکی کی . یزانس ایمپراطورلغناک حوزه حکومتنده برزمان بولمیش اولان یرلر و بویورلرک سکنه‌نی
دیمک . بوراده تمام ایران مقابلیدر : سلجوقیان ایران ؛ سلجوقیان روم کی .
(روم ایلی) ده بویله‌در . چونکه ترک‌لرک ایجاد ایتیش اولدیغی بوتعبیر ایله محدود و معین یرلرده
روم عنصری اقلیتی تشکیل ایدر . موره شبه جزیره‌سی هان سراپا روم‌لرله مسکون‌ایکن (روم ایلی)
نامنی آلامشدی .

(رومی) صفتی هر صنف و مسلکدن بالعموم بیوکرمز ، کال افتخار و ممنویته قبول ایتشلدز .
جلال‌الدین رومی ، اشرف رومی کی اعظم اولیاء الله بوکله ایله تلقب واشتیار ایتدیلر . ابن کاله
(علامه روم) ، (محقق روم) دینیر .

(ترک) عرقناک اک بیوک پادشاهی ، شبه یوقدرکه ، سلطان سلیمان قانونیدر . هم بو پادشاه ،

ای حسنه مغرور سنده صولارسک
 بهار عمریکی برکون آراسک
 اوپاموق سینه که طاشلر صارارسک
 زده سلیمانلر : زده دارالر

۸ — تشرین ثانی — ۳۳۳

یشار شادی

عشق بی ظفر

یورغون .. دکلرنده کزردم خیالک ؛
 مائی وایحه برقاییغم واردی ، مست آب
 تولدن کشاده یالکنی بربرک ماهتاب ،
 محمول ایدی نجوم زریله لیالک .



روئالریله عشق تر و بی زوالک
 مجهول برجزیره مینایه پرشتاب ،
 تنویر ایدردی راهمی ماه المنتقاب ،
 سرمست ایدم شراب تریله ملالک .



انجم ردای لیلی سرمه رکن دکزلره ،

چارپاردی باد زلف ترك زورق زره ،
بن رهنورد ارض املدم صبا ایله .



لكن او پنبه ساحل ، اومائی سرای روز
یلدالرمده اولمدی حالا شفق فروز .
قالدم بویرده واله آفاق هائله !

فریدون نزهت

طوقیو سرایی حقنده

طوقیو سرای هایونی زیارت سرلوحه سی آلتنده [ادبیات عمومی] مجموعه سنک ۱۸، ۱۹ نومرولی
نسخه لرنده مندرج مقاله لرده بیان اولونان بعض نقطه لر حقنده ایضاحات اعطاسنی تاریخ نقطه نظرندن
الزم عد ایلدیکمدن بوبابده حقایق تاریخییه مستند معلوماتی بوجه آتی عرض ایلورم :

صاحب مقاله نك ایلک داخل اولدینی [قیو] حرم دائره سنک [عربه قیوسی] که [پادشاهان آل
عثمانک] دیوان و مراسم سائره یه چقدقلری و متخذ اصوله توفیقاً [خرقة شریف] زیارت مبعجلاه سنک
شرف مثولنه نائل اولان [مخدرات عصمت قرینک] دخول ایلدکری قیودر . بو قیودن کیریلنجه
اطرافی مصنع قیاققرله طولابلری محیط غایت خوش ، تک قبه لی قوریدور ، بوندنصکره ایکنجی
قیودن کیرلکده دیوارلری انک نفیس چینیلرله مزین وزمین چاقل طاشی ایله مفروش بکلمه محلی اولان
قوریدورده تعریف اولنان شادروانسی بنا قرون وسطی طرز معمارییی دکل صرف عثمانلی معماریسنده
قرون جدیدده یعنی دردنجی سلطان محمدخان حضرتلری زماننده انشا ایدلش ویاننده دیوارلری و محرابی
سرایا چینیلرله پادشاه مشار الیه حضرتلرینک یاپدیرمش اولدینی جامع شریفده اوقات خمه بی ادا ایدمک
بندکاتک آبدست آللری ایچون کوزل، ظریف برشادرواندر . صکره اصلا نفاست قدیمه معماریه سنه
خلل کلکسزین ارباب وقوف و تجربه طرفندن پک دلنشین بر صورتده تعمیراتی اجرا اولنوب هر کوره فی
حیران ایدن و آغزک تمنا استدکری او محشم اوزون قوریدور ودها صوکره بویوک قیو دیدکری